

CONVENIO DE COOPERACIÓN EDUCATIVA ENTRE A UNIVERSIDADE DE SANTIAGO DE COMPOSTELA E O INSTITUTO GALEGO DE ESTADÍSTICA PARA A REALIZACIÓN DE PRÁCTICAS ACADÉMICAS EXTERNAS CURRICULARES OU EXTRACURRICULARES DO ALUMNADO DOS ESTUDOS OFICIAIS DE GRAO E MÁSTER UNIVERSITARIO DA UNIVERSIDADE DE SANTIAGO DE COMPOSTELA

REUNIDOS

Dunha parte, Don Antonio López Díaz, Reitor magnífico da Universidade de Santiago de Compostela, que actúa en nome e representación dela en virtude do Decreto 35/2022, do 17 de marzo, publicado no Diario Oficial de Galicia nº 56, do 22 de marzo, do seu nomeamento, e polas facultades conferidas pola Lei Orgánica 2/2023, do 22 de marzo, do Sistema Universitario e o Decreto 14/2014, de 30 de xaneiro, polo que se aproban os Estatutos da Universidade de Santiago de Compostela.

Da outra, Don José Antonio Campo Andión, Director do Instituto Galego de Estatística, que actúa en nome e representación del en virtude do Decreto 295/2009, do 14 de maio, publicado no Diario Oficial de Galicia nº 94, do 15 de maio, do seu nomeamento, e polas facultades conferidas pola Lei 9/1988, do 19 de xullo, de estatística de Galicia e o Decreto 60/2016, do 26 de maio, polo que se aproba o Estatuto do organismo autónomo Instituto Galego de Estatística.

Todas as partes recoñécense plena capacidade e lexitimación abonda para a formalización do presente convenio e, para estes efectos,

EXPOÑEN

- I. Que o Real Decreto 592/2014, do 11 de xullo, que regula as prácticas académicas externas de estudantes universitarios/as establece no seu artigo 8.1.a) a posibilidade de que o alumnado matriculado en ensinanza impartida pola universidade realice prácticas académicas externas, que poderán ser curriculares ou extracurriculares.
- II. Que o Real Decreto 1791/2010, de 30 de decembro, polo que se aproba o "Estatuto do Estudante Universitario", establece no seu artigo 8.f) o dereito do alumnado á realización de prácticas curriculares ou extracurriculares, que poderán realizarse en entidades externas.
- III. Que os Estatutos da Universidade de Santiago de Compostela establecen (Disposición adicional primeira) que "a Universidade de Santiago de Compostela poderá contar coa colaboración de persoas profesionais externas no desenvolvemento de actividades prácticas derivadas de convenios ou acordos con ela, para impartiren prácticas tuteladas externas, segundo o que se estableza nestes convenios, e procurará o adecuado recoñecemento desta colaboración". Así mesmo, no artigo. 51. f) indican que unha función das facultades e escolas é a promoción e implantación de medidas para a realización de prácticas externas.

- IV. Que adecuar os programas educativos ás necesidades do mundo laboral constitúe unha das preocupacións da Universidade de Santiago de Compostela (en diante USC), de aí que sexa un dos seus obxectivos complementar a formación teórica con prácticas en entidades que lle permitan ao alumnado coñecer a realidade laboral.
- V. Que entre as tarefas encomendadas ao Instituto Galego de Estatística (en diante IGE) nos plans anuais de actuación previstos no seu Estatuto figuran as prácticas do alumnado universitario, que se realizarán respectando a Lei 9/1988, do 19 de xullo, de estatística de Galicia e como actuacións complementarias das reguladas na Lei 16/2021, do 20 de decembro, do Plan galego de estatística 2022-2026.
- VI. Que todas as partes consideran necesario un maior achegamento entre o ámbito laboral e a universidade, para facilitar a futura inserción laboral do alumnado universitario egresado mediante a alternancia da súa formación teórica con prácticas externas, acadando ao mesmo tempo a mellor cualificación e inserción no ámbito laboral.
- VII. Que con este convenio preténdese enmarcar a cooperación educativa na que se delimiten as garantías recíprocas do alumnado e do IGE no desenvolvemento do período de prácticas.
- VIII. Que a USC e o IGE comprométense ao respecto do dereito fundamental de protección de datos e de privacidade, polo que cumprirán de xeito leal co Regulamento (UE) 2016/679 do Parlamento Europeo e do Consello, do 27 de abril de 2016, relativo á protección de datos das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), coa Lei Orgánica 3/2018, do 5 de decembro, de protección de datos persoais e garantía dos dereitos dixitais e co resto da lexislación española aplicable nesta materia.

En consecuencia, acordan formalizar este convenio de cooperación coas seguintes

CLÁUSULAS

Primeira. OBXECTO

As partes asinantes acordan establecer un programa para a realización de prácticas académicas externas nas instalacións do IGE, así como para achegar as súas persoas expertas para aquela parte da docencia teórico-práctica especializada que fose precisa. As prácticas poderán ser:

- Curriculares, contempladas nos plans de estudo.
- Conducentes á elaboración dos Traballos fin de grao/Traballos fin de máster, segundo se contempla nos plans de estudo e demais normativa de aplicación.
- Extracurriculares, ou complementarias.

O convenio fixa os mecanismos de colaboración entre as partes para establecer unha adecuada programación, desenvolvemento e verificación da colaboración.

Segunda. REQUISITOS DO ALUMNADO EN PRÁCTICAS

Poderá participar nas prácticas o alumnado dos estudos oficiais de grao e máster universitario da USC.

Para realizar as prácticas académicas externas o alumnado deberá estar matriculado na titulación á que se vinculan segundo as competencias que deba adquirir.

Terceira. NÚMERO DE PRAZAS DE PRÁCTICAS

O número de prazas que se convoquen para realizar as prácticas determinará a comisión de seguimento do convenio e concretarase nas convocatorias que faga a USC.

Cuarta. DURACIÓN, RÉXIME DE PERMISOS E CONDICIÓN DE RESOLUCIÓN ANTICIPADA DAS PRÁCTICAS

1. A duración das prácticas será a seguinte:

- a) As prácticas curriculares terán a duración que estableza o plan de estudos correspondente, nos termos establecidos polo artigo 14.5 do Real Decreto 822/2021, do 28 de setembro, polo que se establece a organización das ensinanzas universitarias e do procedemento de aseguranza da súa calidade.
- b) As prácticas externas extracurriculares terán unha duración non superior ao cincuenta por cento do curso académico, é dicir, 30 ECTS (ou sexa, 750 horas, considerando unha equivalencia de 25h/ECTS).

2. Os horarios de realización das prácticas estableceranse de acordo coas súas características e as disponibilidades do IGE. Deberán ser compatibles coas actividades académica, formativa, de representación e de participación desenvolvidas pola alumna ou alumno da universidade.

3. O réxime de permisos acordarase entre o IGE e a alumna ou alumno e deberá adaptarse ás normas que a universidade poida establecer. En todo caso, o IGE respectará as obrigas que se deriven do cumprimento das actividades académica, formativa, de representación e de participación do alumnado.

4. Poderá ser excluído das prácticas académicas o alumnado que incumpra as actividades definidas no proxecto formativo ou as directrices marcadas polo titor ou titora do IGE. Neste caso, o IGE comunicarlle á universidade esta circunstancia e, de común acordo, ambas entidades poderán dar por finalizada anticipadamente a realización da práctica externa, coa perda dos dereitos formativos e, de ser o caso, económicos que corresponderan ás persoas beneficiarias.

Así mesmo, o alumnado en prácticas poderá, por causas xustificadas, solicitar a renuncia a elas, o que deberá ser resolto pola vicerreitoría con competencias en materia de prácticas académicas.

Quinta. PROXECTO FORMATIVO DAS PRÁCTICAS

O proxecto formativo no que se concretará a realización das prácticas académicas externas deberá fixar os obxectivos educativos e as actividades que se vaian desenvolver. Os obxectivos estableceranse considerando as competencias básicas, xenéricas, específicas e transversais que debe adquirir o alumnado. Así mesmo, os contidos das prácticas definiranse de forma que aseguren a relación directa das competencias a adquirir cos estudos cursados. *Este proxecto formativo especificase no anexo a este convenio para a realización de prácticas académicas externas.*

Sexta. VINCULACIÓN DO ALUMNADO EN PRÁCTICAS CO IGE

1. A relación do alumnado en prácticas co IGE non terá en ningún caso carácter laboral e, polo tanto, non se poderá acoller a ningunha modalidade contractual das previstas no "Estatuto dos Traballadores".
2. As actividades estarán sempre orientadas á aprendizaxe práctica titorizada, polo que o alumnado en prácticas non poderá realizar tarefas de responsabilidade no IGE, nin as propias e exclusivas do seu persoal.
3. O IGE non poderá cubrir co alumnado en prácticas ningún posto de traballo, nin sequera con carácter eventual ou interino.
4. Durante o período de prácticas non se poderá formalizar ningún contrato de traballo entre o IGE e o alumnado.

Sétima. ASEGURAMENTO DO ALUMNADO E RESPONSABILIDADE CIVIL

1. A realización das prácticas estará cuberta polo seguro escolar, sempre que se realicen en territorio nacional. Para o alumnado maior de vinte e oito anos formalizarase obrigatoriamente, ao seu cargo, un seguro de accidentes.
2. A USC dispón dun seguro de responsabilidade civil que cubrirá as posibles continxencias durante o desenvolvemento das prácticas, nos termos estipulados na póliza. Non obstante, no caso das prácticas nas que concorran riscos excepcionais ou outras circunstancias, e así se considere na convocatoria, poderán contratarse seguros adicionais.

Oitava. INCLUSIÓN NO SISTEMA DA SEGURIDADE SOCIAL DO ALUMNADO QUE REALICE PRÁCTICAS EXTERNAS BAIXO A APLICACIÓN DO CONVENIO

1. A realización de prácticas externas ao amparo do convenio determinará a inclusión no sistema da Seguridade Social das persoas que as realicen, que quedarán comprendidas como asimiladas a traballadores por conta aliea no Réxime Xeral da Seguridade Social.
2. Por tratarse de prácticas non remuneradas, o cumprimento das obrigas de Seguridade Social corresponderalle á USC, que asumirá a condición de empresario

e deberá comunicar os días efectivos de prácticas a partir da información que lle facilite o IGE.

3. A cotización á Seguridade Social axustarase ao establecido na disposición adicional quincuaxésima segunda do texto refundido da Lei xeral da Seguridade Social, aprobado polo Real Decreto Lexislativo 8/2015, do 30 de outubro, para o caso de prácticas formativas non remuneradas.
4. A USC garantirá o cumprimento do establecido nesta cláusula para cada un dos/alumnos/as que, en base a este convenio, sexan autorizados/as polo IGE para realizar prácticas nas súas instalacións.
5. Esta cláusula será de aplicación para todo o alumnado que realicen prácticas externas ao amparo deste convenio a partir do 1 de xaneiro de 2024.

Novena. DEREITOS E DEBERES DO ALUMNADO

O alumnado en prácticas terá dereito a contar cun titor ou titora externa do IGE e cun titor ou titora académica da USC.

O *alumnado* en prácticas terá *dereito* a:

- a) Ser avaliado no desenvolvemento das súas actividades segundo o establecido no programa. A avaliación referirase á consecución dos obxectivos de formación que deberán ser recoñecidos polo titor ou titora do IGE. O alumnado terá dereito a coñecer os criterios de avaliación.
- b) Que se lle imputen os créditos cursados para os efectos de finalización de estudos no caso das prácticas curriculares, sempre que contén coa avaliación positiva do seu período de prácticas. No caso das prácticas extracurriculares, a que a USC acredite as prácticas realizadas facéndoas constar no expediente e no Suplemento Europeo ao Título, sempre que contén con avaliación positiva e se realicen antes do remate dos estudos.
- c) Expedición, por parte do IGE, unha vez finalizado o período de prácticas con avaliación positiva, dunha certificación con mención expresa do nivel acadado na realización das prácticas, con indicación da especialidade á que estivo orientada a súa formación, de ser o caso.
- d) Recibir, por parte do IGE, información da normativa de seguridade e prevención de riscos laborais.
- e) Cumprir coas súas actividades académica, formativa, de representación e de participación, previa comunicación con antelación suficiente ao IGE.
- f) Dispoñer, no caso do alumnado con discapacidade, dos recursos necesarios para acceder á tutela, á información, á avaliación e á realización das prácticas en igualdade de condicións.
- g) Conciliar, no caso do alumnado con discapacidade, a realización das prácticas con aquelas actividades e situacións persoais derivadas ou relacionadas coa súa situación de discapacidade.

Durante o período de prácticas, o alumnado deberá desenvolver o proxecto formativo e elaborar unha memoria final.

Con relación ao IGE, o *alumnado deberá*:

- a) Incorporarse na data acordada e cumprir o horario previsto no anexo.
- b) Cumpir e respectar o sistema organizativo do IGE.
- c) Gardar o debido sexilo respecto dos asuntos que coñezan na súa tarefa.
- d) Cumpir e respectar as normas de seguridade e prevención de riscos laborais do IGE.
- e) Cumpir con dilixencia e boa fe as actividades acordadas co IGE.
- f) Cumpir calquera outra obriga prevista na normativa vixente ou nos convenios de cooperación educativa asinados entre a USC e o IGE.

O alumnado de prácticas curriculares estará obrigado á realización da totalidade de créditos dos que estean matriculadas, de acordo co establecido no plano de estudos, para obteren o recoñecemento académico.

O incumprimento das súas obrigas poderá determinar a perda automática dos seus dereitos como estudante en prácticas, sen prexuízo das accións disciplinarias que procedan.

Décima. TITORIZACIÓN DAS PRÁCTICAS

A cada estudante seralle atribuído un titor ou titora académica, que será docente da titulación por designación do centro para cada práctica ofertada e coa misión de facer un seguimento máis directo, dar resposta ás expectativas formativas establecidas, asegurar o correcto desenvolvemento das prácticas e avalialo de acordo co proxecto formativo e o programa ou guía docente da materia. O titor ou titora académica tamén será responsable de avaliar ao alumnado de prácticas externas curriculares conforme os criterios de avaliación que se fixen e segundo o procedemento de avaliación establecido pola USC.

Cada estudante contará tamén cun titor ou titora no IGE, que será a responsable de aplicar o plan de formación previsto e de elaborar os informes de valoración que lle sexan solicitados sobre o traballo desenvolvido pola alumna ou alumno.

Décimo primeira. DEREITOS E OBRIGAS DOS TITORES E TITORAS

A.- O *titor ou titora externa* do IGE terá *dereito*:

1. Ao recoñecemento da súa actividade colaboradora por parte da universidade, a través da súa solicitude.
2. A recibir información acerca do regulamento de prácticas académicas externas.
3. A recibir información sobre o proxecto formativo e as condicións do seu desenvolvemento.

4. A obter a información e o apoio necesarios para o cumprimento dos fins propios da súa función.

B.- O *titor ou titora externa* do IGE terá os seguintes *deberes*:

1. Acoller ao alumnado e organizar a actividade consonte o establecido no proxecto formativo.
2. Supervisar as súas actividades e orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
3. Informar ao alumnado da organización e funcionamento do IGE e da normativa de interese, especialmente a relativa á seguridade e riscos laborais.
4. Coordinar co titor ou titora da USC o desenvolvemento das actividades establecidas no convenio, que deberán contemplar:
 - a) As modificacións do plan formativo que poidan ser necesarias para o desenvolvemento das prácticas.
 - b) A comunicación e resolución das incidencias que puidesen xurdir.
 - c) O control de permisos para a realización de exames e/ou outro tipo de actividades de carácter académico.
5. Emitir o informe final e, de ser o caso, o informe intermedio. O informe final deberá emitirse no prazo de 10 días naturais unha vez finalizado o período de realización das prácticas.
6. Proporcionar a formación complementaria que precise o alumnado para a realización das prácticas.
7. Proporcionar ao alumnado os medios materiais indispensables para o desenvolvemento das prácticas.
8. Facilitar e estimular a achega de propostas de innovación, mellora e emprendemento por parte do alumnado.
9. Facilitarlle ao titor ou titora da USC o acceso ao IGE para o cumprimento dos fins propios da súa función.
10. Gardar confidencialidade en relación con calquera información que coñeza do alumnado como consecuencia da súa actividade como titor ou titora.
11. Prestar axuda e asistencia ao alumnado durante a súa estadía no IGE, para a resolución daquelas cuestións de carácter profesional que poida necesitar no desempeño das actividades que realice na mesma.

C.- O *titor ou titora académica* da USC terá os seguintes *dereitos*:

- a) Recoñecemento efectivo da súa actividade académica, sen que do devandito recoñecemento poida derivarse en ningún caso efectos retributivos

específicos.

- b) Recibir información verbo do regulamento de prácticas académicas externas, así como do proxecto formativo e das condicións baixo as que se desenvolverá a estadía da persoa que debe tutelar.
- c) Ter acceso ao IGE para o cumprimento dos fins propios da súa función.

D.- O *titor ou titora académica* da USC terá os seguintes *deberes*:

- a) Velar polo normal desenvolvemento do proxecto formativo, garantindo a compatibilidade do horario das prácticas coas obrigas académicas, formativas, de representación e de participación do alumnado.
- b) Facer un seguimento efectivo das prácticas, coordinándose co titor ou titora do IGE e vistos, de ser o caso, os informes de seguimento.
- c) Autorizar as modificacións que se produzan no proxecto formativo.
- d) Avaliar as prácticas do alumnado titorizado de acordo co que se establece no artigo 25 do Regulamento de prácticas académicas externas da USC (aprobado no Consello de Goberno do 29 de xullo de 2015).
- e) Gardar confidencialidade sobre a información que coñeza como consecuencia da súa actividade como titor ou titora.
- f) Informar á persoa responsable das prácticas académicas externas na USC das posibles incidencias xurdidas.
- g) Supervisar e, de ser o caso, solicitar a adecuada disposición dos recursos de apoio necesarios para asegurar que o alumnado con discapacidade realice as súas prácticas en condicións de igualdade de oportunidades, non discriminación e accesibilidade universal.

Décimo segunda. MEMORIA DAS PRÁCTICAS

Ao rematar o período de prácticas cada alumna ou alumno deberá realizar unha memoria final sobre o traballo desenvolvido, que entregará ao titor ou titora académica. O seu contido mínimo axustarase ao establecido no Regulamento de prácticas académicas externas da USC e ao modelo propio do centro, se o ten.

Décimo terceira. PROCEDEMENTO DE AVALIACIÓN

O titor ou titora académica, á vista do informe do IGE e da memoria final do alumnado, avaliará as prácticas desenvolvidas cubrindo o correspondente informe de valoración.

Décimo cuarta. CERTIFICACIÓN DO IGE

No caso de que a avaliación da memoria e o informe de actuación do alumnado sexan favorables, o IGE emitirá para cada alumna ou alumno unha certificación na que deben constar o tempo de colaboración e as actividades, traballos, investigacións, etc... realizados. A certificación deberá especificar que carecerá de

efectos académicos, quedando supeditada, a estes efectos, á avaliación que realice a USC das prácticas.

Décimo quinta. EFECTOS DAS PRÁCTICAS

A realización das prácticas curriculares polo alumnado computará para a obtención dos títulos correspondentes co carácter establecido no plan de estudos.

No caso das prácticas extracurriculares, non formarán parte do plan de estudos, pero figurarán no expediente e no Suplemento Europeo ao Título, sempre que se realizaran antes da finalización dos estudos.

Décimo sexta. PROTECCIÓN DE DATOS E SEGREDO ESTATÍSTICO

As partes comprométense a cumprir o Regulamento (UE) 2016/679, do Parlamento Europeo e do Consello, do 27 de abril de 2016, relativo á protección de datos das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), así como na Lei Órgánica 3/2018, de 5 de decembro, de protección de datos persoais e garantía dos dereitos dixitais, e no resto da lexislación española aplicable nesta materia.

O alumnado en prácticas que por razón das actividades formativas teña acceso, en calquera fase do tratamento, a datos de carácter persoal, non revelará a persoa allea ao IGE información da que tivera coñecemento, nin utilizará ou disporá dela dun xeito ou cunha finalidade distinta á esixida polas accións formativas, obriga que subsistirá aínda despois de rematadas as prácticas, respondendo en caso de incumprimento do deber de segredo fronte ao IGE, sen prexuízo das responsabilidades que por igual causa puideran derivarse ante a Axencia Española de Protección de Datos.

A USC protexe e garante o dereito fundamental á protección de datos e amósase especialmente sensibilizada pola salvagarda da privacidade das persoas. O tratamento de datos faise de acordo co Regulamento (UE) 2016/679 citado, coa Lei Orgánica 3/2018, de 5 de decembro, de protección de datos persoais e garantía dos dereitos dixitais, así como co resto da lexislación española aplicable nesta materia. Así as cousas, este tratamento responde aos principios de litude, lealdade, transparencia, limitación da finalidade, minimización dos datos, exactitude, limitación do prazo de conservación, integridade, confidencialidade e responsabilidade proactiva.

O estudante en prácticas tamén quedará sometido a cumprir a normativa sobre segredo estatístico contemplada na Lei 9/1988, do 19 de xullo, de estatística de Galicia e, para tal efecto, asinará o documento que figura como anexo do convenio.

Décimo sétima. COMISIÓN DE SEGUIMIENTO

Créase unha comisión de seguimento e interpretación do convenio. Intégrana por parte da USC o vicerreitor ou vicerreitora con competencias en materia de prácticas académicas externas, ou persoa en quen delegue, e a persoa responsable das

prácticas do centro; e por parte do IGE será a titular da súa secretaría xeral, ou persoa en quen delegue. O vicerreitor ou vicerreitora con competencias en materia de prácticas académicas externas, ou persoa en quen delegue, será a persoa interlocutora da USC co IGE en todo o relativo a este convenio.

A comisión de seguimento terá as seguintes competencias:

1. Resolver os problemas que se presenten na execución do convenio.
2. Interpretar e aplicar, con carácter xeral, as estipulacións do convenio, así como controlar o seu cumprimento e resolver os conflitos entre as partes.
3. Tomar medidas en relación coas incidencias que xurdan na realización das prácticas, incluída a decisión de dar por finalizadas as prácticas para aqueles alumnos e alumnas que incumplan gravemente as obrigas inherentes ás mesmas.

A comisión reunirse cando así o considere necesario calquera das partes.

Décimo oitava. NORMAS DE APLICACIÓN SUPLETORIAS

A falta de determinación no convenio, seranlle de aplicación as seguintes normas:

- Real Decreto 822/2021, de 28 de setembro, polo que se establece a organización das ensinanza universitarias e do procedemento de aseguranza da súa calidade.
- Real Decreto 592/2014, de 11 de xullo, polo que se regulan as prácticas académicas externas dos estudantes universitarios.
- Regulamento de prácticas académicas externas da USC, aprobado polo Consello de Goberno do 29 de xullo de 2015.
- Plan de estudos da titulación.
- Convocatorias de prácticas externas e demais disposicións xerais de aplicación.
- Aplicación supletoria do Regulamento para a xestión de convenios e protocolos xerais de actuación na USC (aprobado polo Consello de Goberno do 30 de abril de 2021), das resolucións e acordos sobre esta materia e que non se opoñan ao Regulamento de prácticas académicas externas da USC.
- De ser o caso, seranlle de aplicación as normas sobre afiliación e cotización de prácticas externas realizadas polo alumnado universitario.

Décimo novena. VIXENCIA DO CONVENIO

O convenio terá efectos desde a súa sinatura e a súa duración será de catro anos, e en todo caso polo tempo que duren as prácticas do alumnado, podendo prorrogarse de forma expresa para os seguintes catro anos de común acordo polas partes e en tanto non se denuncie expresamente como mínimo con tres meses de antelación.

En todo caso, non se poderá rescindir mentres existan estudantes realizando prácticas.

Vixésima. RESOLUCIÓN DO CONVENIO

Serán causas de resolución do convenio:

- a) O mutuo acordo das partes.
- b) O incumprimento das súas cláusulas, tras a reunión da comisión de seguimento.

A denuncia do convenio poderá ser realizada por calquera das partes, debendo comunicalo por escrito coa antelación establecida na cláusula décimo novena.

Unha vez extinguido o convenio deberá asegurarse ao alumnado que está desenvolvendo as actividades formativas obxecto deste acordo a posibilidade de finalizalas.

Vixésima primeira. XURISDICIÓN

As partes comprométense a resolver amigablemente as diferenzas que puideran xurdir a través da comisión de seguimento.

Non obstante, recoñécese a xurisdición contencioso-administrativa como competente na materia, dada a natureza pública dos asinantes do convenio.

Vixésima segunda. PUBLICIDADE

A sinatura do convenio leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal e calquera outras especificacións que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno e na Lei galega 1/2016, do 18 de xaneiro, de transparencia e bo goberno. O convenio será inscrito no rexistro de convenios da Xunta de Galicia, nos termos previstos no Decreto 126/2006, do 20 de xullo.

En proba de conformidade, ambas partes asinan o presente convenio no lugar e data da última sinatura dixital.

POLA UNIVERSIDADE DE SANTIAGO DE COMPOSTELA Por delegación do Sr. Reitor (RR do 21-04-2022 DOG do 26-04-2022) O Vicerreitor de Organización Académica e do Campus de Lugo	POLO INSTITUTO GALEGO DE ESTATÍSTICA
Don Francisco José Fraga López	Don José Antonio Campo Andión

ANEXO I

ANEXO AO CONVENIO DE COOPERACIÓN EDUCATIVA ENTRE A UNIVERSIDADE DE SANTIAGO DE COMPOSTELA E O INSTITUTO GALEGO DE ESTATÍSTICA PARA A REALIZACIÓN DE PRÁCTICAS ACADÉMICAS EXTERNAS CURRICULARES OU ESTRACURRICULARES DO ALUMNADO DOS ESTUDOS OFICIAIS DE GRAO E MÁSTER UNIVERSITARIO**CURSO ACADÉMICO 202...../202....**

As persoas que asinan este documento manifestan que leron e aceptan as condicións e compromisos establecidos no convenio de cooperación subscrito entre a Universidade de Santiago de Compostela (USC) e o Instituto Galego de Estatística (IGE) e, de acordo coas súas cláusulas, fan constar a seguinte información:

1. Tipo de prácticas: ☐ Curriculares ☐ Extracurriculares ☐ TFG/TFM

2. Estudiante beneficiario/a

Nome e apelidos

DNI

Correo electrónico

Teléfono

O/a estudante declara cumprir os requisitos establecidos para realizar as prácticas (cláusula segunda do convenio) e estar ao corrente no pagamento do seguro da cláusula sétima (seguro escolar para menores de 28 anos; seguro específico para maiores de 28 anos).

3. Titulación e curso no que está matriculado/a:

.....

4. Centro de traballo e localidade onde se desenvolverán as actividades:

.....

5. Titor ou titora académica

Nome e apelidos

DNI

6. Titor ou titora do IGE

Nome e apelidos

DNI

7. Duración das prácticas (dd/mm/aa): do..... ao

Nº total de días:Horas/día:

(A USC terá a condición de empresa, asumindo a obriga de realizar as altas e baixas do alumnado en prácticas e, de ser o caso, a cotización cando corresponda, segundo o establecido na cláusula oitava do convenio).

8. O réxime de permisos será acordado entre o IGE e o alumnado e adaptarase ás normas que a USC poida establecer. O IGE respectará as obrigas de asistencia á universidade para cumprir as actividades académica, formativa, de representación e de participación do alumnado.

9. O obxectivo educativo das prácticas é que o alumnado aplique e complemente os coñecementos adquiridos na súa formación académica, favorecendo que adquira competencias que o preparen para exercer actividades profesionais, que faciliten a súa empregabilidade e que fomenten a súa capacidade de emprendemento.

10. Proxecto formativo (actividades, competencias, obxectivos específicos,)

O proxecto formativo das prácticas figurará neste apartado e terá en conta os principios de inclusión, igualdade de oportunidades, non discriminación e accesibilidade universal. O perfil e nivel de afondamento dependerán dos labores a desenvolver polo alumnado no marco do convenio. Durante a súa estadía o alumnado porá en práctica os coñecementos adquiridos, adaptándose á realidade concreta do traballo día a día.

11. Sistemas de avaliación e control: A persoa titora académica, visto o informe do IGE e a memoria do/a estudante, avaliará as prácticas realizadas tal e como se establece no artigo 25, apartado 4, do Regulamento de prácticas académicas externas da USC, aprobado polo Consello de Goberno do 29 de xullo de 2015.

12. O/A estudante comprométese a cumprir coas obrigas establecidas no convenio:

- a) Incorporarse na data acordada e cumprir o horario previsto no anexo.
- b) Cumprir e respectar o sistema organizativo do IGE.
- c) Gardar o debido sxiilo respecto dos asuntos que coñeza nas súas tarefas.
- d) Cumprir as normas de seguridade e prevención de riscos laborais do IGE.
- e) Cumprir con dilixencia e boa fe as actividades acordadas co IGE.
- f) Calquera outro deber previsto na normativa vixente ou nos convenios de cooperación educativa asinados entre a USC e o IGE.

13. Información básica sobre protección de datos persoais da USC

Entidade	Universidade de Santiago de Compostela (USC)
Responsable do tratamento	O responsable do tratamento é a USC. Para calquera dúbida poderá poñerse en contacto con: protecciondatos@usc.gal .
Finalidade	Xestión de procesos de acceso á universidade, de matrícula, continuación de estudos, traslados, xestión dos expedientes académicos, dos títulos e dos cursos de posgrao, terceiro ciclo e formación continua, tramitación de reclamacións, recursos, queixas e suxestións, control económico de prezos, enquisas, prácticas, así como calquera outra actividade que se inclúa na xestión académica administrativa.
Lexitimación	Prestación do servizo público de educación superior (Lei Orgánica 2/2023, de 22 de marzo, do Sistema Universitario e Lei autonómica 6/2013, do Sistema Universitario de Galicia).
Persoas destinatarias	Poderanse ceder datos ás administracións públicas con competencias na materia e nos supostos de obrigas legais.
Dereitos	As persoas interesadas poden exercer os dereitos de acceso, rectificación, supresión, limitación de tratamento, oposición e portabilidade a través da Sede Electrónica en: http://sede.usc.es/sede/publica/catalogo/procedemento/55/ver.html .

Información adicional	A política de privacidade e protección de datos da USC pódese consultar en: http://www.usc.es/gl/normativa/protecciondatos/Politica-privacidade.html .
Transferencias internacionais	Non se prevén.

14. Información básica sobre protección de datos persoais do IGE

Responsable do tratamento	Xunta de Galicia–IGE.
Finalidades	Xestión do alumnado universitario en prácticas no IGE.
Lexitimación	Cumprimento dunha obriga legal aplicable ao responsable do tratamento segundo a Lei 12/1989, do 9 de maio, da función estatística pública, a Lei 9/1988, do 19 de xullo, de estatística de Galicia, e demais normativa aplicable. Tratamento necesario para realizar unha misión en interese público ou no exercicio de poderes públicos conferidos ao responsable.
Persoas destinatarias	Non se prevén cesións de datos.
Dereitos	As persoas interesadas poderán solicitar o acceso, rectificación, limitación e supresión dos seus datos, a través da sede electrónica da Xunta de Galicia ou nos lugares e rexistros establecidos na normativa reguladora do procedemento administrativo común, segundo se recolle en: https://www.xunta.gal/exercicio-de-dereitos .
Contacto persoa delegada de protección de datos e información adicional	https://www.xunta.gal/informacion-xeral-proteccion-datos .

O que asinan, por triplicado, en Santiago de Compostela, a de de 202...

Persoa titora académica,	Persoa titora do IGE,	Estudiante,
Asinado:	Asinado:	Asinado:.....

ANEXO II

COMPROMISO DE CONFIDENCIALIDADE E NON REVELACIÓN DE INFORMACIÓN

Eu, con NIF/NIE, estudante da USC, comprométome a gardar estrita confidencialidade sobre a información á que poida acceder mentres realizo prácticas académicas no IGE. En particular, comprométome a observar os deberes de confidencialidade e segredo recollidos no Regulamento (UE) 2016/679, do Parlamento Europeo e do Consello, do 27 de abril, na Lei Orgánica 3/2018, do 5 de decembro, de protección de datos persoais e garantía dos dereitos dixitais, no Real Decreto 311/2022, do 3 de maio, que regula o esquema nacional de seguridade e no resto de normativa concordante, respecto de calquera tipo de información que poida coñecer ao realizar o meu traballo, e que empregarei só para o que sexa autorizado/a. De acceder a sistemas de información do IGE, fágome responsable dos accesos que se realicen co meu identificador de usuario persoal e comprométome a devolver calquera soporte ou medio telemático proporcionado polo IGE. Estas obrigas subsistirán aínda logo de finalizar a relación co IGE.

Tamén me comprometo a cumprir as normas do IGE, as políticas de seguridade da información da Administración xeral e do sector público autonómico de Galicia, o Decreto 230/2008, do 18 de setembro, polo que se establecen as boas prácticas no uso dos sistemas de información da Administración da Comunidade Autónoma de Galicia e a restante normativa de desenvolvemento. Coñezo as obrigas impostas pola Lei 9/1988, do 19 de xullo, de estatística de Galicia, polas que todas as persoas que interveñan nas actividades reguladas por ela están obrigada a manter o segredo estatístico respecto dos datos comunicados, mesmo logo de concluír as súas actividades profesionais e a súa vinculación cos servizos estatísticos. O segredo estatístico inclúe datos de persoas físicas e xurídicas e ampara todos os individualizados de orde privado, persoal, familiar, económico ou financeiro, usados para elaborar estatísticas. Sei que incumprir estas obrigas dará lugar a responsabilidades por danos e prexuízos, con independencia dos penais e disciplinarias que se puideran derivar.

INFORMACIÓN BÁSICA SOBRE PROTECCIÓN DE DATOS PERSOAIS: Os seus datos serán tratados polo IGE, na súa condición de responsable, para xestionar os compromisos de confidencialidade e non revelación de información. A base lexitimadora é a necesidade de tratar os datos para a execución do contrato subscrito coa organización e o cumprimento dunha obriga legal. Non se prevén comunicacións a terceiros. As persoas interesadas poderán solicitar ante o responsable do tratamento o acceso, rectificación, limitación e supresión dos seus datos, así como opoñerse ao seu tratamento, segundo se recolle en: <https://www.xunta.gal/exercicio-de-dereitos>. Contacto coa persoa delegada de protección de datos e información adicional en: <https://www.xunta.gal/información-xeral-proteccion-datos>.

Asinado, o de de 202..

